

四庫全書

子部

欽定四庫全書

子部

書小史

目錄
卷一至五

詳校官中書臣孫溶

編修臣程嘉謨覆勘

總校官降調編修臣倉聖脉

校對官中書臣李奎

謄錄監生臣徐元駿

書小史原序

書小史者中都陳道人所編也自伏羲畫卦以至五代
上下數千百年之間字體變化如浮雲紀傳所載以書
名者代不乏人而人之賢否藝之高下雖妙跡不能盡
傳於世觀此亦可槩見其萬一道人趣向之雅編類之
勤可謂不苟於用心矣予識之五十餘年每一到都必
先來訪訂證名帖飽窺異書愈久而愈不相忘亦未易
多得也咸淳丁卯重九天台謝愈修書於西湖寓舍時

年七十有四

欽定四庫全書

子部八

書小史目錄

藝術類一 書畫之屬

卷一

紀

卷二

傳

卷三

傳

卷四

傳

卷五

傳

卷六

傳

卷七

傳

卷八

傳

卷九

傳

卷十

傳

臣等謹案書小史十卷宋陳思撰思即臨安

書賈嘗輯寶刻叢編以行世者其所作書苑

菁華專取漢魏以來論書之語集成一編採
掇頗見雅贍魏了翁為序之此則以歷代書
家小傳纂次成帙前有咸淳丁卯天台謝愈
脩序蓋與書苑菁華相輔而行者也書中所
載自庖犧迄五季凡紀一卷載帝王五十一
人傳九卷首后妃十人附以諸女十三人次
諸王二十七人次倉頡至郭忠恕共四百三
十人中間義例亦多未善如閨秀一門自宜

依史例退置書末乃以廁於后妃諸王之間殊為乖舛又如北齊彭城王浹本無能書之名惟史載其八歲時書迹未工為博士韓毅所戲思因此一節遂一槩採入書家中尤為汜濫迥不及書苑菁華之詳密特其排比薈粹猶有可觀頗可為考古者檢閱之助其用心固有足尚者焉乾隆四十六年九月恭校上

總纂官臣紀昀陸錫熊臣孫士毅

總校官臣陸費墀

欽定四庫全書

書小史卷一

宋 陳思 撰

紀

太昊伏羲氏燧人氏之子也因風而生故為風姓以木
王天下始畫八卦造書契代結繩因獲景龍之瑞其制
儀象布政令紀官皆以龍於是始為龍書唐韓晉公湜
嘗獲齊竟陵王子良龍書千五字置於招隱寺乃其遺

法

炎帝神農氏姜姓以火德王始為耒耜以教民稼穡作
陶冶斧斤民用以利嘗百草以濟民病因上黨羊頭山
始生嘉禾八穗帝異之乃作穗書用頒政令

黃帝少典之子姓公孫名軒轅號有熊氏命倉頡沮誦
造書字以正名百物由是古文滋生是時景雲常見郁
郁紛紛帝因為雲書以紀職又嘗遊元扈之上靈龜負
圖而臻文章之繁克自此始帝嘉其感應作書以寫其

狀後世有龜書焉

少昊金天氏名摯字青陽黃帝之子也姬姓少昊之立鳳鳥適至故以鳥紀官作鸞鳳書其文章衣服皆以為象

顓頊高陽氏黃帝之孫昌意之子也靜淵以有謀疏通而知事作科斗書因科斗之名故飾之以形頭麤尾細腹狀團圓如水中之科斗魯恭王時壞孔子宅於壁中得所藏書皆科斗文字今古文是也

帝嚳高辛氏黃帝之曾孫也生而神靈自言其名日月所照風雨所至莫不從服以人事紀官象仙人形書其車器衣服皆為之後代因之遂作此體

帝堯陶唐氏名放勳姓伊耆帝嚳之子也因軒轅靈龜負圖遂作龜書象龜之形焉

帝禹夏后氏名文命妣姓黃帝元孫顓頊之孫鯀之子也舜授禹以位於是大朝天下諸侯因九牧貢金鑄鼎象物故作鐘鼎書象鐘鼎形象

周武王名發姬姓帝嚳之後文王之子也率脩文王緒業時殷紂無道武王東觀兵至於盟津渡河中流白魚躍入王舟中武王俯取以祭凡厥符瑞史臣曰佚紀之文字作為魚書體魚之首骨為乙尾翼為丙蓋是則焉初文王時赤雀銜書集戶至武王又感丹鳥流室以此二瑞故作鳥書勢若翔羽

穆王名滿昭王之子時西域化人來王與之遊而得八駿之乘乃西遊見王母於瑤池之上樂而忘返聞徐偃

王得諸侯遂長驅而歸後登趙州贊皇山大篆吉日癸巳四字於山

漢孝武皇帝姓劉氏諱徹景帝中子也能文辭詩賦初六國時各以異體之書僭為符信而芝草芝英等書興焉秦焚儒典其文煨燼至帝產靈芝於宣房既作芝房之歌因述芝英之書焉

孝元皇帝名奭宣帝太子也好儒多材藝善史書

史書周宣

王太史籀所作大篆十五篇教學童之書也

洞曉音律窮極要妙

後漢肅宗孝章皇帝諱烜顯宗第五子也少寬容好儒術初史游作草書惟君長告令臣下用之建初中杜度善草帝貴其迹詔上章表令作草體始號章草今法帖中有章帝草書辰宿列張等數十字存焉

恭宗孝安皇帝諱祐肅宗孫也年十歲好學史書和帝常稱之

孝靈皇帝諱宏肅宗元孫也帝好學善書自作皇義篇五十章始置鴻都門學生勅州郡王公舉召能為尺牘

辭賦及工書鳥篆者相課試至千人熹平中詔諸儒正五經文字命蔡邕等書刻石立於太學

魏太祖武皇帝姓曹氏諱操字孟德沛國譙人也多材藝自作兵書十餘萬言尤工章草雄逸絕倫張華云漢世安平崔瑗崔瑗子實弘農張芝芝弟昶善草書而武帝亞焉

文皇帝諱丕字子桓武帝太子也善飛白書時於宮中戲為之

高貴鄉公諱髦字彥士文帝孫東海定王霖子也少好學夙成工草隸

吳大帝姓孫諱權字仲謀吳郡富春人性度宏朗仁而多智善行草書南齊王僧虔常得大帝及景帝歸命侯法書上之齊高帝

後主諱皓字元宗大帝權之孫太子和之子也善行隸書梁庾肩吾云魏武筆墨雄贍孫皓體裁綿密李嗣真云孫皓吳人酣暢驕其家室雖欲矜豪亦復平矣

晉景皇帝姓司馬氏諱師字子元河內溫縣人宣帝長子也沈毅有大略少流美譽善正書

文皇帝諱昭字子上景帝之母弟也善正書書賦云挹子元之瓌蹟高子上之雄神量蘊文儒才苞古真或寄詞達禮任道懷仁或仰則鍾繇平視衛臻如晴郊駟馬維岳降神

武皇帝諱炎字安世文帝長子也寬惠仁厚深沈有度量善行草書

東晉元皇帝名睿字景文宣帝曾孫瑯琊恭王覲之子
東朝中興之主也沈敏有度量善正行書當東遷謠曰
五馬浮渡江一馬化為龍書賦云逮乎龍化東遷景文
興嗣天然俊傑毫翰英異元帝之用筆可觀世踰劉之
呈規仰似如發研刃虎駮鶚昭懦夫喪精劍客得志
明皇帝諱紹字道幾元帝長子也幼而聰哲有對日之
奇雅好文詞善書畫

成皇帝諱衍字世根明帝長子也少聰敏及長留心萬

幾務在簡儉善草書書賦云成帝則生知草意穎悟通
諳光使畏魄青疑過藍勁力外爽古風内含若雲開而
乍睹晴日泉湧而懸歸碧潭

康皇帝諱岳字世同成帝母弟也善行草書書賦云康
帝則幼少閒慢迥出凡境駟馬安車不尚馳騁

哀皇帝諱丕字千齡成帝長子也善行書

簡文皇帝諱昱字道萬元帝少子也幼而岐嶷為元帝
所愛及長尤愛玄言留心典籍工行草書

孝武皇帝諱曜字昌明簡文帝第三子也善行草書書賦云真率孝武不規不矩氣有餘高體無所主若露滋蔓草風送驟雨

宋高祖武皇帝姓劉氏諱裕字德興彭城人性嚴整有法度帝素拙於書劉穆之曰此雖小事然宣被四遠願公少復留意帝既不能措意又稟分有在穆之乃曰公但縱筆為大字一字徑尺亦無嫌大既足有所包且其勢亦美武帝從之一紙不過六七字便滿書賦云宋武

德興法舍古初見答道和之啓未披有位之書觀其逸
毫巨麗載兆虎變高躅莫究其涯雄風於焉已扇猶金
玉鑛璞包露貴賤

文皇帝諱義隆武帝第三子也聰明仁厚雅重文儒博
涉經史善隸書及行草張懷瓘云規模大令自謂不減
於師時論以為天然勝羊欣而功夫恨少是亦可尚道
心雖微探索幽深若泠泠水行有巖石間真聲爾李嗣
真云放逸屈摺頗効康昕量其直置孤梗是謝靈運之

流書賦云皇矣文帝天知正隸舉已達於縱橫攀王媚
於緊細向專精而習熟幾可與之興替尚瞻擊水之鵬
搏且並聞天之鶴唳

孝武皇帝諱駿字休龍文帝第三子也少機穎讀書七
行俱下才藻甚美善正行草書書賦云孝武則武威戡
難翰墨馳聲雖稟訓而已高恨一簣而未成徒忌人之
賢已冀及父之令名與思話而雄強追彥琳而愧恥若
夷狄之佳麗慕容顏於桃李

明皇帝諱或字休景文帝第十一子也善行書書賦云
太宗徽音用壯之心遺棄鄙野不無高深快突俗工匠
古鄰今冠祖梨之下果怯鸞鳳之珍禽

齊太祖高皇帝姓蕭氏諱道成字紹伯南蘭陵人姿表
英異龍顏鐘聲鱗文遍體敦樸尚古善屬文工真行草
書篤好不已祖述子敬稍乏筋骨與王僧虔賭書畢帝
曰誰為第一僧虔對曰臣書臣中第一陛下書帝中第
一帝笑曰卿可謂善自謀矣張懷瓘云高帝與簡穆賭

書亦猶驅雞之搏狸稍不自量也書賦云齊高則文武
英威時來運歸挺生紹伯墨妙翰飛觀乎吐納僧虔擠
排子敬昂藏鬱拔勝草負正猶力稽牛刀水展龍性
世祖武皇帝諱贍字宣述高帝長子也剛毅有斷工行
草書帝欲擅書名故王僧虔不敢顯其迹嘗用拙筆書
以此見容書賦云世祖宣遠象賢豈敢仰英規而無功
超筆力而有膽莫顧程式率由冑襟能騁逸氣未忘童
心若橫波束薪泛濫淺深

廢帝鬱林王名昭業字元尚文惠太子長子也美容止
好隸書武帝特所鍾愛勅皇孫手書不得妄出以貴之
嘗謂武帝曰臣書固應勝江夏王帝答曰閹黎第一法
身第二法身昭業小名閹黎江夏王鋒小名也

梁高祖武皇帝姓蕭氏名衍字叔達南蘭陵人也性嚴
整勤學博文好草書張懷瓘云狀貌雖古但乏於筋骨
無奇姿異態稍減於齊高矣帝尤好圖書搜訪天下大
有所獲書賦云梁則高祖叔達恢宏厥躬泯規矩合童

蒙文勝質而辭寡明察衆而理窮猶巧匠琢玉心恆雕蟲

太宗簡文皇帝諱綱字世讚武帝第三子也幼聰睿六歲能屬文及長氣宇寬宏讀書十行俱下博綜羣言善

談玄理工行書書賦云簡文慕鍾不瑕有害傲景喬而

含古

蕭子雲

肩邵陵而去泰

邵陵王綸

侯景將亂帝數夢秦王

焚天下書既而內府書畫數百函後果煨滅於侯景

世祖孝元皇帝諱繹字世誠武帝第七子也聰悟俊朗

天才英發博極羣書工書善畫嘗自圖宣尼像為之贊而書之時人謂之三絕嘗權衡蕭子雲書比二王則若牡雞仰於威鳳子貢賢於仲尼書賦云孝元不拘快利睢盱習寬踈於一體加緊薄而小殊名畫記云承聖末魏師襲荊州城陷帝將降聚其古畫法書及典籍十四萬卷遣後閤舍人高善寶焚之帝欲投火俱焚宮嬪牽衣得免吳越寶劍並將斫柱令折乃嘆曰蕭世誠一至此乎文武之道今夜窮矣周將于瑾於煨燼中捃拾遺

逸得書畫四千餘卷歸於長安

陳高祖武皇帝姓陳氏諱霸先字興國吳興長城人也少儻有大志及長涉獵史籍善行草書書賦云爰及陳氏霸先創業盤桓有威牢落無法等王師憑怒挫衄攻劫

文皇帝諱蒨字子華始興昭烈王之長子也少沉敏有識量美容儀留意經史善行草書

後主諱叔寶字元秀宣帝長子也善行草書陳室富有

書畫隋文帝即位以晉王廣為元帥平之命元帥記室
叅軍裴矩高穎收其書畫得八百餘卷於東京觀文殿
起二臺東曰妙楷藏自古法書西曰寶躅收自古名畫
隋煬皇帝姓楊氏諱廣高祖第二子也少敏慧好學善
屬文好飛白書大業記云煬帝將幸江都宮女半不隨
駕爭泣留帝言遼東小國不足煩大駕願擇將征之攀
車惜留指血染鞅帝意不回因飛白題二十字賜宮嬪
曰我夢江都好征遼亦偶然但留顏色在離別只今年

二王書錄曰大業末帝幸江都秘府圖書多將從行中道船沒大半淪棄其間得存所餘無幾弒逆之後並歸宇文化及至聊城為竇建德所破並皆亡失

唐高祖神堯大聖大光孝皇帝姓李氏諱淵字叔德隴西成紀人也性寬仁善書師王褒得其妙故有梁朝風格尤善行草工而且疾結字不拘常體而筆迹韻美可愛常一日注授千許人吏案遇得好紙筆筆若飛食頃而訖得官人等並不取告符乞寶神筆之迹遂各分所

授官而去書賦云我巨唐之膺休一六合而闡幽武功
定文德修高祖運龍爪陳睿謀自我雄其神貌冠梁代
之徽猷

太宗文武大聖大廣孝皇帝諱世民高祖次子也聰明
英武有大志兼資文武博通羣書善屬文工隸書飛白
行草得二王法尤善臨古帖殆於逼真貞觀初銳意臨
翫右軍真蹟人間購募殆盡嘗自書真草屏風以示羣
下為一時之絕隸書師虞世南嘗患於戈法一日書過

戩字空其落於世南因取筆填之俄而魏鄭公奏事帝
出書示之曰朕近學虞世南似盡其法卿看之鄭公曰
天筆所臨萬象不能逃其形非小臣所可擬倫今仰窺
聖作惟戩字戈法頗逼其真既而舞蹈慶謝上深歎鄭
公高其藻識然益加工焉太宗嘗讌三品已上於玄武
門帝操筆作飛白書賜羣臣或乘酒爭取於帝手唯常
侍劉洎登御座引手得之御史請劾罪以死帝曰昔聞
婕妤辭輦今見常侍登牀竟釋其罪

高宗天皇大聖大宏孝皇帝諱治字為善太宗第九子也善正書飛白龍朔中上自為書與遼東諸將謂許敬宗曰許圜師嘗自愛書可於朝堂開示圜師見甚驚喜私謂從官曰圜師見古跡多矣晉魏已後惟稱二王然逸少多力而醜子敬妍而少力今觀聖跡兼絕二王鳳翥鸞迴實古今書聖帝嘗飛白書賜宰臣人各六字戴至德曰泛洪源俟舟楫郝處俊曰飛九霄假六翮李敬元曰資啓沃罄丹誠崔知悌曰竭忠節贊皇猷皆見意

於辭

中宗孝和大聖大昭孝皇帝諱顯高宗第七子也善飛白書嘗寫昇中述志碑額今見存焉

睿宗元貞大聖大興孝皇帝諱旦高宗第八子也性淳和長而溫恭好學通詁訓工草隸書中宗嘗為武后追福脩聖善寺制度奇麗為都城之最寺內立碑中宗製文睿宗書之書賦云睿宗垂文規模尚古飛五雲而在天運三光以窺戶

玄宗至道大聖大明孝皇帝諱隆基睿宗第三子也孝
友慈仁善騎射通音律歷象之學好圖畫工八分章草
豐茂英特初張說為麗正殿學士獻詩明皇自於綵牋
上八分書讚曰德重和鼎功逾濟川詞林秀發翰苑光
鮮開元中御注御書道德經詔列郡咸建石臺譙郡太
守趙冬曦請置聖祖降生之地書賦云開元應乾神武
聰明風骨巨麗碑版崢嶸思如泉而吐鳳筆為海而吞

鯨

順宗至德宏道大聖孝皇帝諱誦德宗長子也寬
仁喜學藝善隸書德宗工為詩每賜大臣方鎮詩制必
命寫之

書小史卷一

欽定四庫全書

書小史卷二

宋 陳思 撰

傳一后 女 王

漢孝成許皇后大司馬車騎將軍平恩侯嘉女也聰慧
善史書

後漢和帝陰皇后諱某光烈皇后兄執金吾識之曾孫
也少聰慧善書藝

和熹鄧皇后諱綏太傅禹之孫也六歲能史書十二通詩論語志在典籍母嘗非之曰汝不習女工以供衣服乃更務學寧當舉博士耶后重違母言晝脩婦業暮誦經典家人號曰諸生

昭烈梁皇后諱嬪大將軍商之女也少善女工好史書九歲能誦論語治韓詩大義略舉嘗以烈女圖畫置於左右以自監戒

魏文帝甄皇后中山無極人明帝母漢太保甄邯後也

九歲喜書視字輒識數用諸兄筆硯兄謂后言汝當習
女工用書為學當作女博士耶后答言聞古者賢女未
有不學前世成敗以為己誠不知書何由見之

吳王趙夫人丞相趙達之妹善書畫巧妙無雙名畫記
云孫權嘗歎魏蜀未平思得善畫者圖山川地形夫人
乃進所寫江湖九州山岳之勢

晉武元楊皇后諱艷字瓊芝弘農華陰人后少聰慧善
書姿質美麗嫻於女工

東晉安僖王皇后諱神愛瑯琊臨沂人中書令獻之女也善書

梁武郁皇后諱徽高平金鄉人父曜太子舍人后母宋文帝女尋陽公主也幼明慧善隸書讀史傳女工之事無不嫻習

陳武宣章皇后諱要兒吳興烏程人少聰慧美容儀善書能誦詩及楚辭

後主沈皇后諱婺華吳興武康人父君理母即武帝女

會稽穆公主也后性端靜有識量聰明強記涉獵經史
工書翰國亡與後主俱入長安及後主薨后自為哀辭
文甚酸切書賦云沈氏后德名標婺華允光親署獨美
可嘉如晚晴陣雲傍日殘霞

唐則天順聖皇后武氏諱曐并州文水人也臨朝稱尊
號曰大周金輪皇帝好飛白書自題昇仙太子廟碑額
后好書嘗墨制問石泉公王方慶求其祖父書方慶進
十一代祖導已下二十八人書共十卷后御武成殿示

羣臣仍令中書舍人崔融為寶章集以叙其事復賜方
慶當時以為榮書賦云武后君臨藻翰時欽順天矜而
永保先業從人欲而不顧兼金

諸女

魯秋胡妻者魯人秋胡遠宦三年不歸其妻幽居懷思
而作蟲書秦書有八體四曰蟲書以書幡信首蕭子良
云寶蠶書也蓋婦人閨閫之所事故因擬象韋續五十
六種書體云蟲書魯秋胡妻因浣蠶所作亦曰雕蟲書

漢安定皇甫規妻馬氏善屬文能草書時為規答書記人怪其工

蔡琰字文姬即中郎邕之女也博學有才辯工書善章草適河東衛仲道夫亡無子歸寧於家興平中天下喪亂文姬為胡騎所獲沒於胡中十二年曹操素與邕善痛其無嗣乃遣使者以金璧贖之而重嫁於董祀祀為屯田都尉犯法當死文姬詣曹操請之乃原祀之罪操因問曰聞夫人家先多墳籍猶能記憶之否文姬曰昔

亡父賜書四千許卷流離塗炭罔有存者今所誦憶裁
四百餘篇耳操曰今當使十吏就夫人寫之文姬曰妾
聞男女之別禮不親授乞給紙筆真草唯命於是繕寫
送之文無遺誤今太宗皇帝所勒法帖中有文姬十四
字云我生之初尚無為我生之後漢祚衰

晉衛夫人名鑠字茂猗廷尉展之女弟恒之從妹汝陰
太守李矩之妻也善隸書張懷瓘云隸書尤善規矩鍾
公碎玉壺之水爛瑤臺之月婉然芳樹穆若清風右軍

少嘗師之子敬年五六歲已解書神情朗悟嘗從諸兄造焉夫人乃書大雅吟賜之後右軍亦愛其書而臨寫之唐人評云衛夫人書如插花舞女低昂美容又如美女登臺仙娥弄影紅蓮映水碧沼浮霞

王羲之妻郗氏鑒之女也甚工書兄愔與曇謂之女中筆仙

王凝之妻謝氏字道韞安西將軍奕之女也聰識有才辯善正行書甚為舅氏所重李嗣真云雍容和雅芬馥

可翫

郝愔妻傅氏善正書

見庾肩吾書品

王洽妻荀氏善書

王珉妻江氏善書

宋孔琳之妻謝氏善書

唐臨川公主太宗女也下嫁周道務主工籀隸能屬文

高宗立上孝德頌帝下詔褒答

劉秦妹歸馬氏善臨學王右軍蘭亭及安西帖咄咄逼

真秦翰林書人也書賦云馬家劉氏臨効逼斥安西蘭亭貌奪真蹟如宓妃遺形於巧素再見如在之古昔

房璘妻高氏善隸書

嘗書太原府太谷縣令安虎堅美政頌歐公集古錄有跋

諸王

後漢北海敬王睦靖王興之子光武兄伯升之孫也少好學博通書傳能屬文善史書當世以為楷則光武器之明帝為太子尤見親幸甚愛其法及寢疾帝駟馬令作草書尺牘十首

樂成靖王黨明帝子聰慧善史書喜正文字與肅宗同年尤相親愛

魏陳思王植字子建武帝子善屬文言出為論下筆成章亦工書

晉齊獻王攸字大猷文帝第二子也少而岐嶷及長清和平允愛經籍能屬文善尺牘為世模楷王僧虔云晉齊王攸書京洛以為楷法張懷瓘云蘭芳玉潔奇而且古書賦云偉哉齊王手蹟長留翰墨之外仁賢是優重

則突兀嵩華輕則叅差斗牛

武陵威王晞字道叔元帝子也善正書書賦云赳赳道叔遠淳通俗全姓名而孰多議風度而不足元子憚其威武吾徒遵其軌躅

會稽文孝王道子字道子簡文帝子少以清澹為謝安所稱善行書書賦云道子雅薄綿密纖潤露輕藏沈假曲躡峻猶尺水之含衆象小山之擬萬仞

宋南平穆王鐸字休元文帝第四子少好學有文才善

正書書賦云南平休元筆力自全幼齒結構老成天然
比夫鳥在驚龍潛泉神采卓爾文辭燦然

海陵王休茂文帝第十四子也善正書書賦云休茂尚
冲已恭法則長於用筆結字短於精神骨力性靈可觀
運用未極猶鳬雛鵠子初備羽翼

齊臨川獻王映字宣光高帝第二子也幼而警悟美言
笑善騎射解聲律工左右書左右射

武陵昭王暕字宣昭高帝第五子也高祖雖為方伯而

居處甚貧諸子學書無紙筆暝嘗以指畫空中及畫掌學字遂工篆法

衡陽王鈞字宣禮高帝第十一子也七歲出繼衡陽王性好學善屬文工正書嘗手自書細書寫五經部為一卷置於巾箱中以備遺忘侍讀賀玠問曰殿下家自有墳索復何須蠅頭細書別藏巾箱中答曰巾箱中有五經於檢閱既易且一更手寫則永不忘諸王聞而爭効為巾箱五經巾箱五經自此始也

江夏王鋒字宣穎高帝第十二子也年四歲性方整好學書畜於母張氏舍張氏無紙乃倚井欄為書書滿則洗之已復更書如此者累月又晨興不肯拂窓塵而先畫塵上學為字書五歲高帝使學鳳尾諾一學即工高帝大悅以玉麒麟賜之曰麒麟賞鳳尾矣工書為當時藩王所推南郡王昭業亦稱工書謂武帝曰臣書固應勝江夏王武帝答闍黎第一法身第二法身昭業小名闍黎鋒小名也

唐陸龜蒙說鳳尾諾或問余曰鳳尾諾為何等物圖即書即對曰余之所聞自

晉訖于梁陳以來藩邸之書也凡封子弟為王則開府
辟僚屬取當時士有學行才藻者中是選其所下書東
宮則曰今上書則曰牋諸王下書則曰教上書則曰啟
應和文章則曰應令應教下其制一等故也其事行則
曰諾猶漢天子肯臣下之奏曰可也鳳尾則所諾牋之
文也絳繅然襴襪然織與繪莫的知既肯其行必有褒
異之辭若今之批答案晉元帝為琅瑯王時帝美其才
今通習外事常使批鳳尾諾南齊江夏王鋒高帝第十
二子甚憐之年五歲使學鳳尾諾下筆便
工帝大悅以玉麒麟賜之餘未見其出

竟陵文宣王子良字雲英武帝第二子也少有清尚禮
才好士善行書書賦云子良則能知未善心遠蹟邇家
風若遺古則翻鄙雖有力而無體將從真而自美猶土

階茅茨儉德之始

卷二

梁邵陵攜王綸字世調武帝第六子也少穎悟博學善屬文能書尤工尺牘隸書更變古法甚有趣媚書賦云世調則氣吞元常若置度內方之惠達蕭特旨趣猶昧擅時譽而徒高考遺踪而罕逮

陳始興王伯茂字鬱之文帝第二子也性聰敏好學謙恭下士世祖深愛重之時征北人於丹徒盜發晉郗曇墓大獲晉右將軍王羲之書及諸名賢事蹟事覺其書

並沒官藏於秘府文帝以伯茂好古多以賜之由是伯茂大工草隸甚得右軍法

廬陵王伯仁字壽之文帝第八子官至光祿大夫中武將軍善行書

武陵王伯禮字用之文帝第十子陳亡入隋為臨洮太守善行書

永陽王伯智字策之文帝第十二子少敦厚有器局博涉經史善行書陳亡入隋大業中為國子司業

桂陽王伯謀字深之文帝第十三子位至散騎常侍善行書書賦云高踈壯浪復睹伯謀如策馬馳逐葦航泛浮

新蔡王叔齊子子肅宣帝第十一子也風采明瞻博涉經史善屬文能正書陳亡入隋為尚書主客郎

北齊彭城景思王洸字子深神武第五子也元象二年拜通直散騎常侍封長樂郡公博士韓毅教洸書見洸筆迹未工戲洸曰五郎書畫如此忽為常侍開國今日

後更宜用心。洙正色答曰：昔甘羅為秦相，未聞能書。凡人惟論才具，何如？豈必勤勤筆迹？博士當今能者何為？不作三公。洙時年益八歲矣，毅甚慚。

唐魯哀王智雲，初名稚詮。高祖子，善射，工書奕。

漢王元昌，高祖第七子，少好學，能書畫。尤長正行書。諸王仲季兼有能名。韓王曹王即其亞也。曹則妙於飛白，韓則工於草行。李嗣真云：漢王作獻之氣勢，或如舞劍，往無鄰。幾書賦云：漢王童年自得書意，夙承義獻守法。

不二

韓王元嘉高祖第十一子少好學聚書至萬卷又採碑文古跡多得異本叅定同異尤善書畫

魯王靈夔高祖第十九子篤學善草隸通音律

曹王明太宗之子特善飛白不減其父

岐王隆範睿宗子追冊惠文太子範好學工書愛儒士無貴賤為盡禮又聚書畫皆世所珍者初隋亡禁內圖書湮沒唐興募訪稍稍復出藏於秘府長安初張易之

奏令善工整治乃密使摹肖殆不可辨竊其真本藏於
家既誅悉為薛稷取去稷又敗範得之初不聞奏後慮
焉乃盡焚之書賦云惠文靡倦博學敦勸恨夫有始無
終灰燼成空苟懼存而按閣徒榮歿而昇宮尚可謂梁
園筆壯樂府文雄累聖重光之盛業六書一藝之精工

書小史卷二

欽定四庫全書

書小史卷三

明 陳思 撰

傳三 三代 秦 漢

倉頡黃帝時史官也首有四目通於神明仰視奎星圜
曲之勢俯察龜文鳥迹之象博採衆美合而為字是曰
古文孝經援神契曰奎主文章倉頡放象是也皇甫謐
曰黃帝史倉頡造文字記言行策藏之名曰書契

仙人務光湯之師也湯以天下讓務光辭往清泠之陂
植薤而食清風時至見其積葉交偃象而為倒薤篆以
寫紫經三卷王愔文字志云垂支濃直若薤葉也或云
出扶風曹喜

周史佚文王時太史也尤善為奇字文王之時周家忠
厚仁及草木有虎不害名曰騶虞白質元章馴於靈囿
騶虞義獸也不踐生草仁之至也於是佚軌則前皇錯
綜而為虎書

史籀周宣王時為史官善書師模倉頡古文始籀以為
聖迹湮滅失其真本今所傳者纔髣髴而已故損益而
廣之或同或異謂之為篆篆者傳也傳其物理施之無
窮亦曰史書加之銘利鉤殺自然機發信為質文之權
輿非至精孰與于此今妙迹雖絕於世考其遺法肅若神
明又作籀文其狀雅正體則石鼓文存焉允所謂楷隸
曾高字書淵藪故使小學者漁獵其中矣書賦云籀之
狀也若生動而神憑通自然而無涯遠則虹紳結落通

則瓊樹離披

孔子陬人字仲尼魯襄公二十二年生六經之文皆孔子手書遭秦焚燼後世不復見至漢魯共王壞孔子舊宅得古文論語皆科斗文字蓋孔子門人所錄也今傳於世者惟比干墓銅盤吳延陵季子墓碑存焉碑凡十字與古文字異而迹類大篆唐開元中明皇以延陵碑字湮泐敕翰林書人殷仲容脩正厥迹由是世得傳之

大歷四年潤州牧蕭定得其摹本以江左張從申善書因命勒石并書文記復立丹陽縣李于廟

司馬子韋宋太史也景公時熒惑失度公懼脩德熒惑
退舍於是子韋作轉宿書象蓮花未開形

秦李斯楚上蔡人少從荀卿學帝王術西入秦為丞相
呂不韋舍人不韋賢之任為郎因得說秦王王說之聽
用其計竟并天下位至丞相斯妙篆始省改之以為小
篆著倉頡七篇畫如鐵石字若飛動作楷隸之祖為不

易之法其銘題鐘鼎及作符印至今用焉今泰山嶧山
秦望山等碑皆斯遺迹斯雖草創遂造其極矣書賦云

斯之法也馳妙思而變古立後學之宗祖如殘雪滴溜
映朱檻而垂冰蔓木含芳貫綠林以直繩

趙高仕秦為中軍府令善史書教始皇少子胡亥書及
獄律法令取史籀大篆或頗省改為小篆作爰歷篇六
章立於太學

胡毋敬本櫟陽獄吏為太史令博識古今文字亦與程
邈李斯省改大篆著博學篇七章並能覃思舊章稽
合衆訓

程邈字元岑下邳人始為衙縣獄吏得罪始皇幽繫雲陽獄中覃思十年變大篆益小篆方圓而為隸書三千字奏上始皇善之出為御史衛恒曰秦既用篆奏事繁多篆字難成即令隸人佐書故曰隸書漢因行之甄鄧定六書四曰佐書是也秦造隸書以赴急速惟官司刑獄用之餘尚用篆焉

羽人王次仲上谷人少有異志小年入學屢有靈竒年未弱冠變倉頡書為今隸書始皇時官務繁多得次仲

文簡略赴急速之用甚喜遣使命召之三徵不至始皇
大怒制檻車送之於道化為大鳥出在檻外翻然長引
至於西山落二翮于山上今為大翮小翮山山上立祠
水旱祈焉

漢蕭何沛人善籀篆何作未央宮制度宏壯覃思三月
以題其額觀者如流何便秃筆書時謂之蕭籀焉八體
有署書亦何所定題蒼龍白虎二闕

司馬相如字長卿成都人善詞賦工筆札辨六律測尋

二氣文帝時令長卿采日辰之禽屈伸其體升降其勢象四時之氣為氣候時書王融云後漢東陽公徐安于搜諸史籍得十二時書皆像神形也

董仲舒廣川人武帝時言災異作草藁未上

顏師古曰所作起草

為藁也主父偃竊而奏之

嚴延年字次卿東海下邳人官至河南太守雅工史書規模於趙高時稱其妙

史游元帝時官至黃門令善草書王愔云漢元帝時史

游作急就章解散隸體麤書之漢俗簡墮漸以行之是也此乃存字之梗槩損隸之規矩縱任奔逸赴速急就因草創之義謂之草書唯君長告令用之臣下則不許即今章草書也

王尊字子贛

音貢

涿郡高陽人官至東郡太守竊學問能

史書

即籀書
奇字也

張敞字子高河東平陽人官至京兆尹善古文傳之子吉吉傳其出杜鄴鄴傳子林吉子竦字伯松王莽時至

郡守封侯博學文雅過於子高自三代以來古文之學
蓋絕子高精勤習之其後有杜林衛宏為之嗣焉

陳遵字孟公京兆杜陵人哀帝時為河南太守善隸書
與人尺牘主皆藏之以為榮

杜鄴字子夏魏郡繁陽人官至涼州刺史少孤其母張
敞女鄴壯從敞子吉學問得其家書初鄴從張吉學吉
子竦又幼孤從鄴學問亦著於世尤長小學

顏師古曰
小學謂文

字之學也周禮八歲入小學保
氏教國子以六書故因名云

李長成帝時為將作大匠善古文作元尚篇皆倉頡中正字

揚雄字子雲成都人雄博學多識奇字劉歆侯芭皆從學雄以為史篇莫善於倉頡作訓纂始李斯作倉頡篇趙高作爰歷篇胡毋敬作博學篇漢興閭里書師合之摠謂之倉頡篇斷六十字為一章凡五十五章至平帝元始中召天下通小學者以百數各令記字于未央庭中雄取其有用者作倉頡訓纂篇三十四章以續倉頡

重複之字天鳳五年卒

爰禮沛人善古文孝平時召禮等百餘人說文字於未央庭中以禮為小學元士

後漢杜林字伯山扶風茂陵人涼州刺史鄴之子歷位大司空有雅材尤工古文過於鄴也故世言小學由杜公嘗於西河得漆書古文尚書一卷寶玩無已每困阨自以為不能濟于亂世嘗抱經歎曰古文之學將絕於此初衛宏長於古學方造林未見則闇然而伏及會面

林以漆書示宏曰常以此道將絕於此何意東海衛君復能傳之是道不墜于地矣光武建武中卒

衛宏字敬仲東海人官至給事中脩古學善屬文作尚書訓詁師於杜林後之學古文者皆祖于杜林衛宏也曹喜字仲則扶風平陵人工篆隸明帝建初中為秘書郎善草懸針垂露之法後世行之衛恒云曹喜善篆小異於李斯邯鄲淳師焉略究其妙韋誕師淳而不及也班固字孟堅扶風安陵人官至中郎將九歲能屬文好

古工篆李斯曹喜之法悉能究之昔李斯作倉頡篇趙高作爰歷篇胡毋敬作博學篇漢興閭里書師合之摠謂倉頡篇斷六十字為一章凡五十五章至平帝元始中徵天下通小學者於未央庭中揚雄取其有用者作訓纂篇三十四章以訓纂續倉頡也孟堅乃復續十三章至和帝永初中賈鮪又撰異字取孟堅所續而廣之為三十四章用訓纂之末字以為篇目故曰滂喜篇言滂施太盛也凡一百二十三章文字備矣

賈逵字景伯扶風平陵人善書明帝時為郎與班固並校秘書撰諸經解學者宗之

杜度字伯度京兆杜陵人章帝時為齊相善章草雖史游始作草書傳不紀其能又光武朝劉睦善草書史皆絕其迹創其神妙其惟杜公韋誕云杜氏傑有骨力而書字微瘦若霜林無葉瀑水迸飛崔氏法之書體甚濃結字工巧時有不及張芝喜而學焉轉精其巧可謂草聖超前絕後獨步無雙張芝自謂上比崔杜不足下方

羅趙有餘蕭子良云伯度本名操為魏武帝諱為度庾
肩吾云杜度濫觴于草書書賦云草分章體肇起伯度
時君重而立名自我行而作故製波循利創質畜怒
賈魴善隸書撰滂喜篇以倉頡為上篇訓纂為中篇滂
喜為下篇故謂之三倉說文曰魴以三倉之書皆為隸
字隸字始廣而篆籀轉微矣

徐幹字伯張扶風平陵人官至班超軍司馬邊境稱為
名將善章草書班固與超書稱之曰因得伯張書藁筆

勢殊工知識讀之莫不歎息實亦藝由己立名自人成者也後有蘇班亦平陵人五歲能書甚為伯張稱歎許慎字叔重汝南召陵人官至太尉南閣祭酒少好古學師於賈逵喜正文字尤善小篆規模李斯甚得其妙作說文解字十四篇萬五百餘字慎後疾篤令子冲詣闕上之安帝末卒

崔瑗字子玉安平人官至濟北相文章蓋世善小篆章草師於杜度媚趣過之點畫精微神變無礙利金百鍊

美玉天姿可謂冰寒於水袁昂云崔瑗書如危峰阻石
孤松一枝王隱謂之草賢庾肩吾云崔瑗擅名北中迹
罕南度世有得其摹本者王子敬見之稱美以為張伯英
極似之然伯英祖述于崔其骨力精熟則過也其遺迹
絕少小篆則有張平子碑存焉瑗以順帝漢安二年卒
崔實字子真瑗之子也博學有俊才桓帝時官至五原
太守常與諸博士正定五經子真母劉氏博通墳籍動
見儀則非惟實天性才敏亦由訓導之功其草雅有父

風張茂先甚稱之

羅暉字叔景京兆杜陵人少脩名節為功曹會計吏轉羽林監善草書著聞三輔張伯英與同郡太僕朱賜書云上比崔杜不足下方羅趙有餘賜亦杜陵人時稱工書

趙襲字元嗣京兆長安人官至燉煌太守與羅暉並以能草見重關西矜巧自與衆頗惑之張伯英素相友善靈帝時卒

劉德昇字君嗣潁川人桓靈之時以造行書擅名雖以草創亦豐瞻妍美風流婉約獨步當時胡昭鍾繇並師其法世謂鍾善行押書是也而胡書體肥鍾書體瘦並各有德昇之美也

蔡邕字伯喈陳留圉人官至左中郎將封高陽鄉侯博學好著述能畫工書創造飛白妙有絕倫尤得八分之精微體法百變窮靈盡妙獨步古今篆隸絕世中歲之積筆力未精及其暮年方窮其妙動合神功建寧中校書

東觀奏求正定六經文字靈帝許之邕乃自書丹於碑
使工鐫刻立於太學門外於是後儒晚學咸取正焉梁
武帝云蔡邕書骨氣洞達爽如有神力書賦云伯喈
三體八分二篆榮戟彎弧星流電轉纖逾植髮峻極層
巘

師宜官南陽人靈帝好書徵天下工書於鴻都門至數
百人八分稱宜官為最大則一字徑大小字方寸千言
甚矜其能而性嗜酒或時至酒家因書其壁以售之觀

者雲集沽酒多售則鑿滅之宜官後為表術將今鉅鹿
宋子有耿球碑是術所立宜官書也

張芝字伯英燉煌酒泉人幼而高操博學好古經明行
修朝廷以有道徵不就故時稱張有道性嗜書凡家之
衣帛皆書而後練張懷瓘云章草師于杜度崔瑗龍驤
豹變青出于藍又創為今草天縱尤異率意超曠若清
澗長源流而無限縈迴岸谷任于造化至于交龍駭獸
奔騰拏攫之勢心手隨變窮冥不知其所以然也精熟

神妙冠絕古今韋仲將謂之草聖豈徒言哉伯英嘗自
云上比崔杜不足下方羅趙有餘誠則尊師之辭其心
肺間語也又善隸書以獻帝初平中卒李嗣真云伯英
章草似春虹飲澗落霞浮浦又如渥霧沾濡繁霜搖落
張昶字文舒伯英季弟也為黃門侍郎善八分隸書章
草家風不墜奕葉清華書類伯英時人謂之亞聖雖筋
骨不及而妍華過之八分碑今在華陰建安十一年卒
李嗣真云文舒西嶽碑文但覺妍冶殊無骨氣

毛宏字文雅河南陽武人工書服膺梁鵠研精八分成一家法獻帝時為郎中教於秘書八分皆傳宏法以建安末卒

左伯字子邕東萊人特工八分名與毛宏等列小異於邯鄲淳亦擅名漢末又能作紙漢興用紙代簡至和帝時蔡倫工為之而子邕尤得其妙故蕭子良答王僧虔書云子邕之紙妍妙輝光仲將之墨一點如漆伯英之筆窮神盡思妙物遠矣邈不可追然子邕之八分亦猶

恒山之文皮即東北之美者也

張超字子並河間鄆人留侯之後有文才官至別部司馬工章草擅名一時字勢甚峻吳人以皇象方之范曄云超之草書妙絕時人史筆稱載遂得宣聲後葉庾肩吾云子並崔家州里頗相倣倣可謂翳馭於鹽冰寒於水

姜詡梁宣田彥和皆伯英弟子並善草書

孫敬字文寶家貧好學少時嘗畫地學書遂工篆隸

傳奕善隸札家貧傭書後有金帛洛陽咸稱善書而得富也

唐綜魯人當漢魏之交夢蛇繞身寤而狀之而為蛇書

書小史卷三

欽定四庫全書

書小史卷四

宋 陳思 撰

傳

魏

吳

蜀

晉

魏梁鵠字孟皇安定烏氏人舉孝廉為郎少好書受學於師宜官以善八分知名靈帝重之亦在鴻都門下遷幽州刺史魏武甚愛其書嘗懸帳中又以釘壁以為勝宜官也庾肩吾云孟皇功盡筆力字入帳中時邯鄲淳

亦得次仲法淳宜為小字鵠宜為大字不如鵠之用筆
盡其勢也黃初中更脩夫子廟陳思王為文鵠八分書
之入妙

胡昭字孔明潁川人少而博學老而彌篤有夷皓之節
甚能史書真行又妙衛恒云昭與鍾繇並師於劉德昇
俱善行草而胡肥鍾瘦尺牘之迹動見模楷羊欣云胡
得張芝骨索靖得其肉韋誕得其筋張華云胡昭善隸
書華與荀勗共整理記籍又立書博士置弟子教習以

鍾胡為法可謂宿士矣嘉平二年卒

邯鄲淳字子叔潁川昆陽人官至給事中志行清潔才學通敏書則八體悉工師於曹喜尤精古文大篆八分隸書自杜林衛宏以來古文派絕由淳復著太祖甚敬異之淳博聞古藝特善蒼雅許氏字指八體六書精究其理有名於時以書教諸皇子正始中又書古文篆隸三字石經於漢碑之西其文蔚煥三體復宣校之說文篆隸大同而古文小異衛恒云魏初傳古文者出於邯

鄆淳蔡邕採斯喜之法為古今雜形然精密閒理不如淳也梁鵠云淳得次仲法韋誕師淳而不及也袁昂云即鄆淳書應規入矩方圓乃成

韋誕字仲將京兆人官至侍中服膺於張芝兼即鄆淳之法諸書並善尤精題署明帝時淩雲臺初成誤先釘榜而未題以籠盛誕轆轤長絙引之使就榜書之誕甚危懼乃戒子孫絕此楷書著之家令初青龍中洛陽許鄴三都宮觀始就令詔仲將大為題署以為永制以御

給筆墨皆不任用因奏云蔡邕自矜能書無斯喜之法
非流紈綺素不妄下筆夫工欲善其事必先利其器若
用張芝筆左伯紙及臣墨無此三具又得臣手然後可
以逞徑丈之勢方寸千言然草迹之妙亞乎索靖梁武
帝評云韋誕書如龍威虎振劍拔弩張書賦云魏之仲
將奮藻獨步或迸泉湧溢或錯玉班賦蹟遺情忘契入
神悞然而負才異履危懼高明自煎髣髴改素生非其
代痛惜不遇

韋康字元將誕之兄亦工書

韋熊字少章誕之子善書時人云名父之子克有工事
世所美焉張華云京兆韋誕子熊潁川鍾繇子會並善
隸書

鍾繇字元常潁川長社人才思通敏舉孝廉為郎歷官
侍中尚書僕射封東武亭侯魏國初建遷相國明帝即
位遷太傅有脚疾乘輿上殿尤善書師曹喜蔡邕劉德
昇張懷瓘云真書絕妙乃過於師剛柔備焉點畫之間

多有異趣可謂幽深無際古雅有餘秦漢以來一人而
已雖古之善政遺愛結於人心未足多也梁武帝云鍾
繇書如雲鵲游天羣鳥戲海行間茂密實亦難過庾肩
吾云鍾繇書天然第一工夫次之妙盡許昌之碑受禪碑也
許昌今在窮極鄴下之牘賀魏武破虞世南云鍾繇師資德

昇馳驚曹蔡倣學而致一體真楷獨得其妍

鍾會字士季繇之子官至司徒善書有父風稍備筋骨
兼美行草尤工隸書美姿獨秀逸致飄然有凌雲之志

亦所謂劍則干將莫邪焉會嘗詐為荀勗書就勗母鍾夫人取寶劍會兄弟以千萬造宅未移居勗乃潛畫繇形像於壁會兄弟入見感動便廢宅勗書亦會之比也庾肩吾云士季之範元常猶子敬之稟逸少而工拙兼効真草皆成書賦云觀士季之軌轍審鍾家之超越將遺古而皆能與象賢而蹈拙如後生之可畏寔氣蓋於前哲

衛覲字伯儒河東安邑人官至侍中少風成以才學稱

尤工古文篆隸草體傷瘦筆力絕妙衛恒書勢云魏世傳古文者出於邯鄲淳伯儒嘗寫淳古文尚書還以示淳淳不能別卒謚敬侯

張揖字敬仲清河人魏初為博士工楷書有名魏世與韋仲將相善書亦其亞揖嘗著埤蒼廣雅古今字詁綴拾遺漏增長事類抑亦於文為益者也然其字詁方之許篇古今體用或得或失

劉廙字嗣恭安陽人官至黃門侍郎妙草書文帝器之

命虞通草書

杜畿字伯張京兆杜陵人官至尚書僕射子恕字務伯
太和中為散騎黃門侍郎出為河東郡太守並善草隸
虞松字叔茂會稽人官至中書令大司農善草書書賦
云名微格高復見叔茂體裁簡約肌骨豐嫵如空凝斷
雲水泛連鷺

宋翼鍾繇弟子也翼嘗作書平直相似狀如箕子繇叱
之翼三年不敢見繇乃潛心改迹翼初書惡晉太康中

有人於洛下破鍾繇墓翼得筆勢論讀之依此法學名
遂大振

吳皇象字休明廣陵江都人官至侍中工八分篆及章
草章草師於杜度先是有張子並陳良甫並稱能書然
陳恨瘦張恨峻休明斟酌其間甚得其妙世謂沈著痛
快張懷瓘云右軍隸書以一形而衆相萬字皆別休明
章草雖相衆而形一萬字皆同各造其極八分雄逸力
乃均於蔡邕而婉冶不逮通議傷於多肉矣書賦云廣

陵休明樸質古情難以窮真非可學成似龍蠖啓仲盤
復行

張紘字子綱廣陵人喜文章善篆書官至侍御史嘗與
孔融書自篆融遺子綱書云前勞手筆多為篆書每舉
篇見字欣然獨笑如復睹其人然融之此言不易於得
也紘之小篆頗有聲譽

張昭字子布彭城人容貌矜嚴有威風為孫權軍師少
好學善隸書

處士張宏字敬禮吳郡人篤學不仕嘗著烏巾時號張
烏巾善篆隸具於飛白絕妙當時飄若遊雲激若驚電
飛仙舞鶴之態盖有類焉自作飛白叙勢備其美也歐
陽詢曰飛白張烏巾冠世其後逸少子敬亦稱妙絕

賀劭字興伯吳興人官至太子太傅善章草書書賦云
賀氏興伯同時共體瘦而不疎逸而寡禮等殊皇賀品
類兄弟

朱育山陰人會稽典錄云育少好奇字凡所特達皆依

體象類造作異字千名以上育後仕朝常在臺閣為東觀令遥拜清河太守加位侍中推刺占射文藝多通

蜀諸葛亮字孔明瑯琊陽都人位至丞相其篆隸八分今法帖中有元莫大寂混合陰陽字殊工

諸葛瞻字思遠亮之子也官至侍中僕射軍師將軍強識善書畫

晉何曾字穎考陳郡陽夏人魏明帝時為黃門郎晉武帝即位官至太保乘輿上殿曾博聞好學工於藁草甚

有古質乏於風味亦猶人則抱素木即對冰亦為時所珍

荀勗字公曾潁川人在魏為大將軍掾入晉位至尚書令多材藝善書畫鍾會嘗詐作勗書取寶劍勗書亦會之比也

楊肇字季初滎陽宛陵人官至折衝將軍荊州刺史工於草隸咸寧元年卒潘岳誄曰草隸兼善尺牘必珍足無輟行手不釋文翰動若飛紙落如雲亦猶甘茂不能

自通借餘光於蘇代安仁之誅抑不其然書賦云季初
則隱姓名展纖勁寫搨共傳賞能之盛猶踞牙鉤爪超
越陷穽

嵇康字叔夜譙國鉅人官至中散大夫奇才不羣美詞
氣有風儀雖土木形骸不自藻飾人以為龍章鳳墨若
高逸之士雖在布衣有傲然之色故如臨不測之淵使
人神清登萬仞之巖自然意遠所與神交者惟王戎山
濤等為竹林七賢唐人評云嵇康書如抱琴半醉詠物

緩行又若獨鶴歸林羣鳥乍散書賦云叔夜才高心在
幽墳允文允武令望令聞精光照人氣格凌雲力舉巨
石芳逾衆芬

阮籍字嗣宗陳留尉氏人官至步兵校尉博覽羣籍尤
好莊老嗜酒能嘯善彈琴工行草書

阮咸字仲容官至散騎侍郎與叔父籍為竹林之遊妙
解音律善彈琵琶工行草書

王戎字濬仲瑯琊臨沂人官至侍中幼穎悟神彩秀朗

善隸行書

山濤字巨源河內懷人武帝時為侍中司徒有器量善正行書書賦云巨源正書樸畧仍餘染翰忘筌寄情得魚若拔賢草澤匿銳茅廬

劉伶字伯倫沛國人官至建威參軍善行草書

向秀字子期河內懷人官至散騎常侍清悟有遠識雅好莊老之學善行書見七賢帖

衛瓘字伯玉河東安邑人魏侍中覲之子仕魏為尚書

郎入晉為尚書令明識清允尤善諸書引索靖為尚書
郎號一臺二妙時議謂伯玉放手流便過索而法則不
如之嘗云我得伯英之筋恒得其骨索靖得其肉伯玉
採張芝法取父書參之遂至神妙天姿特秀若鴻鵠奮
翼飄飄乎清風之上率情運用不以為艱章草入妙品
衛恒字巨山瓘之仲子官至太子黃門侍郎善古文草
隸章草其古文過於父祖體含風雅調合絲桐探異鈎
深悠然獨徃博識古今文字得汲冢古文論楚事者最

妙恒嘗翫之作四體書勢并造散隸書弟宣善篆及草
名亞父兄宣弟庭亦工書恒子璪玠俱有書名家風四
世不墜

索靖字幼安燉煌龍勒人漢張伯英之離孫官至征西
司馬少有出羣之量才藝絕人善章草及草書出於韋
誕峻險過之有若山形中裂水勢懸流雪嶺孤松冰河
危石其堅勁則古今不逮或云楷法過於衛瓘甚矜其
書名其書曰銀鉤蠶尾武帝愛之王隱云索靖草書絕

世學者如雲時論云精熟至極索不及張妙有餘姿張不及索素昂云索靖書如遊颿忽舉鷲鳥乍飛又善八分亦韋鍾之亞也

羊祐字叔子泰山南城人漢蔡邕外孫博學能屬文善書仕魏歷中書黃門侍郎武帝受禪以佐命功封鉅平郡公

張華字茂先范陽人官至司空壯武公博涉羣書盈於萬卷高才達識天文術數無所不精善章草書體勢尤

古

傅元字休奕北地泥陽人官至司隸校尉少孤貧博學
善屬文尤精篆隸得鍾胡之法見重當時唐人評云傳
元書如項羽投戈荆軻執戟

王允字信之官至衛將軍善草隸又張嘉善隸書羊欣
云嘉師於鍾氏勝王羲之在臨川時也又皇甫定年七
歲善史書從兄謚深奇之

樂廣字彥輔南陽涇陽人累遷侍中河南尹有遠識喜

談論善草書

呂忱字伯雍任城人官至義陽王典祠令善書博識古今文字撰字林五篇萬二千八百餘字表上之字林則說文之流小篆亦許慎之亞也

杜預字元凱京兆杜陵人漢齊相杜度即六世之祖也祖畿魏尚書僕射父恕幽州刺史並善行草書預博學通敏尚文帝妹官至鎮南將軍特進當陽侯父祖三世善章草書時人以衛瓘方之謂之杜衛二氏焉

左思字太冲齊國臨淄人家世儒學少習鍾胡書及鼓琴遂善隸書

陸機字士衡吳郡人官至後將軍少有異才善行書吳亡與弟雲俱入洛王僧虔云陸機吳士書也無以校其多少

陸雲字士龍機之弟官至大將軍司馬善行草書

張越字仲治燉煌人官至太子舍人梁至刺史善草書張翰字季鷹吳郡人有清才善屬文工草書官至齊王

問大司馬覩天下方亂因秋風起思吳中菰葉蓴菜鱸
魚遂命駕而歸人謂之見機書賦云季鷹有聲古貌磅
礴雖無名驗攀附張索如疑陰斷雲垂翅一鶚

成公綏字子安東郡白馬人累遷中書侍郎博涉經傳
有俊才善隸書作隸書體一篇行於世

蔡克字子尼陳留考城人官至成都王掾工草書書賦
云子居簡約片月孤峰千歲之下森森古容

劉琨字越石中山人官至太尉善行書書賦云越石偉

度粃糠翰墨如不伐樹而愛人示問鼎而在德

盧諶字子諒范陽涿人為劉琨司空從事中郎琨敗為石季龍所得為侍中中書監善正書并草與崔悅齊名諶法鍾繇悅法衛瓘而俱習索靖之草皆盡其妙子偃孫邈並有書名

辛謚字叔重隴西狄道人少有志尚博學善屬文工草隸書為時楷法召拜太子舍人諸王文學累徵不起永嘉末長安陷沒於劉聰

江瓊字孟琚仕晉為馮翊太守善蟲篆訓詁受學於衛
覬永嘉亂棄官西投張軌子孫因居涼土世傳家業

偽趙劉聰字元明元海之子幼聰慧好學善屬文工草
隸

劉曜字永明元海族子幼聰慧善屬文工草隸

書小史卷四

欽定四庫全書

書小史卷五

宋 陳思 撰

傳四 晉

東晉王導字茂宏瑯琊臨沂人官至丞相謚曰文獻公
少有風鑒識量清遠善草隸元明二帝並工書者推獎
於茂宏王僧虔云導書甚有楷法師學鍾衛好愛無厭
喪亂狼狽猶懷鍾尚書宣示帖衣帶過江後在右軍處

借王敬仁敬仁死其母見脩平生所愛遂以入棺王愔云王導行草見重當世書賦云業盛瑯琊茂宏厥初衆能之一乃草其書將以潤色前範遺芳後車風稜載蓄高利有餘類賈勇之武士等相驚之戲魚

王恬字敬豫導之子官至後將軍會稽內史性簡傲多技藝奕碁為中興第一草隸當時無與為比尤長於臨倣率性而運則復非工時有張翼善隸書尤善倣倣而劣於敬豫也

王洽字敬和恬之弟官至中書令理識明敏書兼諸法
於草尤工落簡揮毫有郢匠成風之勢雖卓然孤秀未
至運用無方從兄右軍云弟書遂不減吾飾之過也王
僧虔云洽與右軍書俱變古形不爾至今猶法鍾張
王幼字敬倫洽之弟官至車騎將軍善草書
王薈字敬文導幼子官至散騎常侍善行書

王廙字世將琅琊臨沂人官至平南將軍荊州刺史工
草隸飛白祖述張衛遺法亦好索靖之風嘗得索七月

二十六日書一紙每寶玩之遭喪亂乃四疊綴於衣中以過江王僧虔云王平南廩是右軍叔自過江東右軍之前惟廩為最畫為晉明帝師書為右軍法其飛白志氣極古垂鵬鶚之翅羽類旌旗之卷舒時人云王廩飛白右軍之亞也

劉超字世踰瑯琊臨邑人官至衛尉零陵忠侯善正書超筆蹟與元帝相類自職居近密遂絕其與外交書書賦云體大法殊實誰世踰稟天然而自強亂帝札而見

拘猶朝廷宿舊年德相趨

陶侃字士衡秣陵人官至侍中大將軍事元明二帝性聰敏善正書遠近書疏莫不手答筆翰如流書賦云雍容士衡季孟公旅肌骨閒媚精神慢舉如辭山登朝混迹雜處

顧榮字彥先吳郡人官至驃騎將軍善草書書賦云彥先尚質無而不有猶崆峒之上世俗誰偶

紀瞻字思遠丹陽秣陵人官至車騎將軍好讀書手自

抄寫妙解音律善行書

卞壺字望之濟陰宛句人官至侍中驃騎大將軍善草書書賦云望之之草緊古而老落紙筋脈分行羽抱如充仞多士交速雜寶

應詹字思遠汝南南頓人官至鎮南大將軍幼孝以學藝文章稱善草書書賦云思遠則藁草懸解筆墨無在真率天然忘情罕逮猶羣雀之飛廣廈小魚之戲大海熊遠字孝文豫章人官至大將軍長史善正書書賦云

孝文剛斷謹正援毫古雖拙利今稱且高如賁冑之躍
駿武賁之操刀

郗鑒字道徽高平金鄉人官至太宰草書卓絕古而且
勁書賦云道徽之豐茂宏麗下筆而剛決不滯揮翰墨
而厚寔深沉等漁父之乘流鼓枻

郗愔字方回鑒之子官至司空善衆書張懷瓘云雖齊
名庾翼不可同年其法遵於衛氏尤長於章法濃纖得
衷意態無窮筋骨亦贍若鴻鵠奮六翮飄然遊乎太虛

王僧虔云郗愔章草亞於右軍梁武帝云郗愔書得意甚熟而取妙特難踈散風氣一無雅素

郗曇字重熙愔之弟官至北中郎將善草書書賦云密壯竒姿撫蹟重熙若投石拔距怒目揚眉

郗超字景興愔之子官至中書郎臨海太守善行草書王僧虔云郗超草書亞於二王緊媚過於其父骨力不及也書賦云景興當年曷云世乏正草輕利脫略古法郗儉之字處約曇之子官至太子率更令善草書

却恢字道允儉之之弟官至鎮軍將軍善正行書書賦
云處約道允家之後俊狂草勢而兄優謹正書而弟潤
俱始登於學次慙一虧於九仞

庾亮字元規潁川鄢陵人明穆皇后之兄官至太尉美
姿容善談論工行草書王僧虔云庾亮書亦能入錄

庾懌字叔豫亮之弟官至衛尉將軍善正行書書賦云
遺古效鍾叔豫高蹤雖穩密而傷浮淺猶葉公之愛畫
龍

庾冰字季堅亮之弟官至中書監以雅素垂風凡亮常
以為庾氏之寶善書

庾翼字稚恭明穆皇后之弟官至車騎將軍荊州刺史
善草隸章草少與羲之齊名殊為世重兄亮亦有書名
曾就右軍求書逸少荅云稚恭在彼豈復假此王僧虔
云庾翼書少時與右軍齊名右軍後進內外宗尚翼猶
不忿在荊州與都下書云小兒輩乃賤家雞而愛野雉
皆學逸少書須吾還當比之右軍嘗以章草荅亮亮以

示翼翼乃大服因與右軍書云吾昔有伯英章草十紙
因喪亂遺失嘗歎妙迹永絕今見足下答家兄書煥若
神明頓還舊觀書賦云積薪之美更覽稚恭名齊逸少
墨妙所宗善草則鷹搏隼擊工正則劒鐔刀鋒愧時譽
之未盡覺知音而罕逢

庾准字彥祖亮之孫官至豫州刺史西中郎將善草書
書賦云荒蕪快利彥祖為容似較狡兔於大野任平陂
之所從

范汪字元平順陽人官至安北將軍贈散騎常侍善正書有謝朓啓傳於世書賦云順陽筆精吾見元平近瞻元常鍾繇俯視國明張澄利且掩薄能多似生如班翰之運斧乏棟梁以經營

范甯字武子汪之子官至中書侍郎善正書書賦云武子正筆頗全古質去凡忘情任樸不失猶高人之與釋子志由道而秉律

劉惔字真長沛郡人官至丹陽尹善行草書書賦云真

長則草含稚恭

庾翼

之厚爽正邇越石

劉琨

之羈束輕浮森

峭穠媚藻縟落衆木於秋杪狎羣鷗於水曲

孔侶字敬思會稽人官至大司農善行書

孔愉字敬康會稽人官至車騎將軍善草書書賦云敬
思敬康二孔殊芳思行則輕利峭峻類驚虬逸駿康草
則古質鬱紆如落翮摧枯

丁潭字世康會稽人官至散騎常侍善正草書書賦云
若夫返古不忘吾推世康似無逸少如稟元常猶落太

階之蕙英掇祕府之芸芳

孔廡字季舒會稽人官至光祿大夫工書書賦云季舒
纖勁循古有禮遇稀難評唯署一啓

謝尚字仁祖陳郡陽夏人官至散騎常侍博綜衆藝善
草書書賦云謝氏三昆尚草特峻猶注飛澗之瀑溜投
全牛之虛刃

謝安字安石尚之從弟位至太傅和粹通敏姿容溫雅
人皆比之王導謂文雅過之學草正於右軍右軍云卿

是解書者然知解書為難張懷瓘云安石尤善行書亦猶衛洗馬風流名士海內所瞻王僧虔云謝安亦入能流殊亦自重乃為子敬書嵇中散詩得子敬書有時裂作校紙書譜云謝安素善尺牘而輕子敬之書子敬嘗作佳書與之謂必存錄安輒題後答之甚以為恨

謝奕字無奕安之兄官至安西將軍善行書書賦云達士逸蹟乃推無奕毫翰云為任興所適

謝萬字萬石安之弟官散騎常侍亦工書

王珣字元琳洽之子官至給事黃門侍郎善行書

王珣字季琰珣之弟官至中書令工隸書及行草時謂
小王之亞也自導至珣三世善書時人方之杜衛二氏
王僧虔云珣筆力過於子敬書舊品云嘗書四尺素自
朝操筆至暮便竟首尾如一又無誤字子敬嘗戲云弟
書如騎驃駸駸恒欲度驂騑前斯可謂子善矢良兵利
馬疾穿圍破的難與爭鋒書賦云繩繩宜爾傑出季琰
露鋒芒而豁懷傍禮樂而無檢猶搏扶搖而坐致超峻

極而非險

王廙字伯輿即導孫薈子官至司徒左長史善行書書賦云溫溫伯輿亦扇其風風流之表軒冕之中骨體慢正精彩冲融已高天然恨乏其功如承奕葉之貴胄備風訓之神童

王曠羲之父也官至淮南太守善行隸書

王羲之字逸少琅琊臨沂人官至右軍將軍會稽內史少有美譽善書為古今之冠草隸八分飛白章行備精

諸體自成一家之法千變萬化得之神功自非造化發
靈豈能登峰造極其所措意皆自然萬象無以加也然
剖析張公之草而濃纖折衷乃愧其精熟損益鍾君之
隸雖還用增華而古雅不逮至研精體勢則無所不工
所謂冰寒於水亦猶雅頌得所鍾鼓云乎羲之隸行草
章草飛白五體俱入神品八分入妙有子七人獻之最
知名元之凝之徽之操之並工草隸梁武帝評云王羲
之書如龍跳天門虎卧鳳閣故歷代寶之永以為訓

王元之羲之長子善草書

王凝之羲之次子官至左將軍會稽內史工草隸

王徽之字子猷凝之弟官至黃門侍郎善正草書

王操之字子重徽之弟歷侍中尚書豫章太守善正行

草書

王渙之徽之弟善行草書

王獻之字子敬逸少第七子清峻有美譽尤善草隸兼

妙丹青幼學父書次習於張邕後改變制度別創其法

率爾師心冥合天矩至於行草興合若孤峰四絕迥出
天殊其峭峻不可量也子敬七八歲時學書右軍潛從
後掣其筆不脫乃嘆曰此兒當有大名遂書樂毅論一
篇與之學後題書賜官奴竟能極小真書窮微入聖筋
骨緊密不減於父故人謂之小聖官奴即子敬小字也太
元中新起太極殿謝安欲使子敬題榜以為萬世寶而
難言之乃說韋仲將題凌雲臺事子敬揣知其旨乃正
色曰仲將魏之大臣寧有此事使其若此知魏德之不

長安遂不之逼也子敬隸行草章草飛白五體俱入神品八分入能品或謂子敬為小令非也子敬為中書令太元十一年卒於官年四十三族弟珉代居之至十三年而卒年三十八時謂子敬為大令珉為小令

王濛字仲祖太原晉陽人官至長山令哀靖皇后父也追贈光祿大夫善隸書法於鍾氏狀貌似而筋骨不備衛臻陶侃並其亞也王僧虔云王濛書可比庾翼書賦云奧若太原之英二子間生仲祖慕元常之則懷祖

王述

通文獻

王藻

之情方言慕而我愧比叔文

謝藻

而此榮習所

通而不及叅放之

溫放

而先鳴結束體正肆力專成猶

猶棟梁富於合抱乃匠斲而未精

王修字敬仁濛之子官至著作郎善隸書嘗求右軍書

乃寫東方朔畫像讚與之殆欲窮其妙而未盡其美子

敬每省修書云咄咄過人始王藻愛鍾氏書喪亂狼狽

猶衣帶盛尚書宣示帖過江後以與右軍右軍借敬仁

及敬仁亡其母見此書平生所好乃遂與入棺殷仲堪

書亦敬仁之亞也

王述字懷祖太原人官至中書令藍田使善草書書賦云高利迅薄連屬欹傾猶鳥避羅而勢側泉激石而分橫

王坦之字文度述之子官至侍中中書令善行書

王允之字深猷官至衛將軍會稽內史善草行書

謝藻字叔文會稽人官至中書侍郎善正書書賦云叔文法鍾繇薄精練用筆雖巧結字未善似漸陸之遵鴻

等窺巢之乳燕

謝璠伯官至散騎常侍善草書

見法帖

戴逵字安道譙郡鉅人隱居不仕幼有巧慧聰悟博學能鼓琴工書畫總角時以雞子汁澠白瓦屑作鄭玄碑自書刻之文既奇麗書亦妙絕

戴顓字仲若逵之子隱避有高名亦不仕隱居桐廬父善琴書顓並傳其業

李充字宏度江夏鍾武人衛夫人之子累遷中書侍郎

善楷書妙叅鍾索世咸重之

李式字景則即充從兄衛夫人之猶子官至侍中善草
隸甚佳其叔母善書右軍云李式是平南之流

平南將軍王廙

也亦可比庾翼弟定子公府能名同式

張澄字國明吳郡人官至光祿大夫善正書王僧虔云
張澄書當時亦呼有意書賦云國明勵躬鍾氏餘風壯
麗纖薄守雌知雄如道門之子仙路時通

張彭祖澄之子官至龍驤將軍善隸書張懷瓘云右軍

每見彭祖鱁素尺牘輒存而玩之夷齊雖賢若仲尼不言未能高舉亦猶彭祖附青雲之士不泯於世也

荀輿字長允潁陰人官至國子助教工隸書章草嘗寫狸骨方一紙右軍見以為絕倫後擬倣數十通云此乃天然功弗可及也庾肩吾云荀輿狸骨方學而難逮墨妙至此時人不稱猶伯樂之顧則價增十倍然觀其意趣不先於衛夫人當是右軍中年所賞若暮齒而見應不至歎服也

劉召字彥祖彭城人官至御史中丞累遷侍中善小篆
妙工飛白雖不及張宏亦一時之冠也作飛白書勢一
篇時有柳詳亦善飛白彥祖之亞也

張翼字君祖下邳人官至東海太守尤善草隸劣於王
愐時穆帝令翼寫王右軍手表帝自批後右軍殆不能
別久乃悟云小人幾欲亂真書賦云君祖馳馭藝忝令
譽窮正驗草而罕逮其能作偽亂真而未可為據正企
鍾而悠邈草師王而莫著



書小史卷五